

**O‘ZBEKISTON RESPUBLIKASI VAZIRLAR MAHKAMASINING
QARORI**

**TOSHKENT SHAHRIDA ADJU UNIVERSITETINI TASHKIL ETISH BO‘YICHA
QO‘SHIMCHA CHORA-TADBIRLAR TO‘G‘RISIDA**

O‘zbekiston Respublikasi Prezidentining “Toshkent shahrida Adju universitetini tashkil etish to‘g‘risida” 2018-yil 30-noyabrdagi PQ-4041-son qaroriga muvofiq Toshkent shahrida Adju universitetining faoliyatini samarali tashkil etish hamda qulay shart-sharoitlar yaratish maqsadida Vazirlar Mahkamasi qaror qiladi:

1. O‘zbekiston Respublikasi Oliy va o‘rta maxsus ta’lim vazirligi va Adju universiteti (Koreya Respublikasi) o‘rtasida Adju universiteti ta’lim dasturlarini joriy etish to‘g‘risida Kelishuv imzolanganligi ma’lumot uchun qabul qilinsin.

2. O‘zbekiston Respublikasi Moliya vazirligi Vazirlar Mahkamasining zaxira jamg‘armasi mablag‘lari hisobiga Toshkent shahrida Adju universitetini tashkil etishda Adju universitetiga (Koreya Respublikasi) dastlabki maslahat ishlarini bajarish uchun to‘lovni amalga oshirish maqsadida Oliy va o‘rta maxsus ta’lim vazirligiga 2,1 mln AQSh dollariga teng miqdorda konvertatsiya xarajatlarini inobatga olgan holda O‘zbekiston Respublikasi Markaziy bankining kursi bo‘yicha mablag‘ ajratsin.

Belgilansinki, Adju universitetiga (Koreya Respublikasi) o‘tkazib beriladigan 2,1 mln AQSh dollariga teng miqdordagi mablag‘ soliq solish obyekti hisoblanmaydi.

3. O‘zbekiston Respublikasi Oliy va o‘rta maxsus ta’lim vazirligi Adju universiteti (Koreya Respublikasi) bilan imzolangan ta’lim dasturlarini joriy etish to‘g‘risidagi Kelishuvga muvofiq Adju universiteti (Koreya Respublikasi) tomonidan taqdim etiladigan xarajatlar rejasiga asosan to‘lovni amalga oshirsin.

4. Toshkent shahar, Yashnobod tumani, Asalobod ko‘chasi, 113-uyda joylashgan Yashnobod temir yo‘l kasb-hunar kolleji hamda Toshkent shahar, Yashnobod tumani, Asalobod ko‘chasi, 113 A-uyda joylashgan Yashnobod qurilish kasb-hunar kollejining bino va inshootlari tegishli hududlari bilan birgalikda (keyingi o‘rinlarda obyekt deb ataladi) O‘zbekiston Respublikasi Oliy va o‘rta maxsus ta’lim vazirligiga operativ boshqarish huquqi asosida berilsin, keyinchalik ushbu joyda Toshkent shahridagi Adju universiteti belgilangan tartibda tekin foydalanish huquqi bilan joylashtirilsin.

Belgilab qo‘yilsinki, Yashnobod temir yo‘l kasb-hunar kolleji hamda Yashnobod qurilish kasb-hunar kollejining o‘quvchilari o‘qishini bitirishlariga kadar tegishlicha yuqorida ko‘rsatilgan obyektida o‘quv jarayonini davom ettiradilar.

5. Obyektni rekonstruksiya qilish, kapital ta’mirlash hamda jihozlash ishlari bo‘yicha:

O‘zbekiston Respublikasi Oliy va o‘rta maxsus ta’lim vazirligi huzuridagi “Yagona buyurtmachi xizmati” injiniring kompaniyasi — buyurtmachi etib;

istisno tariqasida, tender savdolarini o‘tkazmasdan, eng maqbul takliflar tanlovi asosida tanlab olinadigan tashkilotlar bosh loyihachi hamda bosh pudratchi (yetarlicha mashina va mexanizmlar bilan ta’minlangan, soha bo‘yicha zarur ko‘ruvchi-muhandislarga va obyektlar qurilishida katta tajribaga ega bo‘lgan, moliyaviy barqaror tashkilotlar orasidan) etib belgilansin.

6. O‘zbekiston Respublikasi Investitsiyalar va tashqi savdo vazirligi Oliy va o‘rta maxsus ta’lim vazirligi bilan birgalikda:

obyektning loyiha-smeta hujjatlarini ishlab chiqish hamda qurilish-ta’mirlash va jihozlash ishlarini boshlash uchun mablag‘larni 2019-yil Investitsiya dasturi doirasida oliy ta’lim muassasalarini qurish, rekonstruksiya qilish va kapital ta’mirlash uchun nazarda tutilgan markazlashtirilgan kapital qo‘yilma mablag‘larini qayta taqsimlash hisobidan yo‘naltirsin;

2020 — 2022-yillarga mo‘ljallangan O‘zbekiston Respublikasi Investitsiya dasturini shakllantirishda tasdiqlangan loyiha-smeta hujjatlariga muvofiq obyektни rekonstruksiya qilish, kapital ta’mirlash va jihozlash loyihalari ushbu dasturlarga belgilangan tartibda kiritilishini nazarda tutsin.

7. O'zbekiston Respublikasi Oliy va o'rta maxsus ta'lim vazirligi Bandlik va mehnat munosabatlari vazirligi bilan birgalikda Yashnobod temir yo'l kasb-hunar kolleji hamda Yashnobod qurilish kasb-hunar kollejining ishdan bo'shayotgan xodimlarini ishga joylashtirish choralarini ko'rsin.

8. Mazkur qarorning bajarilishini nazorat qilish O'zbekiston Respublikasi Bosh vazirining o'rinbosari — moliya vaziri J.A. Qo'chqorov, O'zbekiston Respublikasi Bosh vazirining ijtimoiy rivojlantirish masalalari bo'yicha o'rinbosari A.A. Abduxakimov hamda oliy va o'rta maxsus ta'lim vaziri I.U. Madjidov zimmasiga yuklansin.

O'zbekiston Respublikasining Bosh vaziri A. ARIPOV

Toshkent sh.,
2019-yil 20-iyun,
518-son

(Qonun hujjatlari ma'lumotlari milliy bazasi, 21.06.2019-y., 09/19/518/3319-son)